



## Al-Majallah menang Anugerah Buku Negara 2015

Oleh: SHALFARINA SHAHRIMAN

Kandungan yang padat, informatif serta penulisan yang berstruktur melayakkan buku Al-Majallah: Panduan Syariah; Institusi Kewangan Islam memenangi Anugerah Buku Negara 2015 bagi Buku Umum Terbaik kategori Undang-Undang.

Buku terakhir yang ditulis oleh mantan Dekan, Pusat Bahasa Moden & Sains Kemanusiaan (PBMSK), Allahyarham Profesor Dr. Abd Jalil Borham adalah mengenai peraturan dan undang-undang institusi kewangan Islam yang mematuhi syariah.

Pengarah Penerbit, Profesor Madya Dr. Mohd Ghani Awang berkata, buku tersebut diambil dari Panduan Syarak oleh Ahli Jawatankuasa Syariah Bank Pembangunan Malaysia Berhad (BPMP) dan Majalah Ahkam Johor: Kod Undang-Undang Sivil Islam Kerajaan Johor 1331H/1913M yang telah diselenggarakan oleh Allahyarham.

“Buku ini adalah usaha Allahyarham bagi memudahkan pembaca memahami dengan lebih terperinci isi kandungan yang terdapat dalam buku Majallah al-Ahkam-al `Adliyyah yang ditulis ketika zaman

pemerintahan kerajaan Turki Uthmaniyah.

“Dalam buku ini, Allahyarham merumikan seluruh isi kandungan Al-Majallah daripada tulisan jawi dan mewujudkan tajuk-tajuk kecil pada setiap bilangan bagi memudahkan pembaca memahami kandungan buku tersebut,” katanya.

Menurut beliau lagi, penerbitan buku ini sesuai untuk dijadikan sebagai teks kajian dan rujukan penyelidik, pelajar, institusi perbankan Islam, suruhanjaya sekuriti, dan takaful. Kejayaan ini merupakan bukti keupayaan pensyarah tempatan dalam menghasilkan buku yang berkualiti dan bermanfaat kepada masyarakat umum.

